

四庫全書

集部

欽定四庫全書

集部

唐文粹卷

二十一

詳校官庶吉士臣謝恭銘

助教臣常循覆勘

總校官檢討臣何思鈞

校對官中書臣陸 湘

謄錄監生臣馮萬程

欽定四庫全書

唐文粹卷二十

宋姚鉉編

頌丙

雅附總八首

神武四

大唐中興頌

元結

鳳翔出師紀聖功頌

楊炎

大唐河西平胡頌

平淮西雅 附柳宗元

時政一

聖政紀頌 來鵠

豐年一

德勝頌 歐陽詹

祥應一

歲星居心頌 權德輿

高世一

伯夷頌 韓愈

大唐中興頌 并序

元結

天寶十四年安祿山陷洛陽明年陷長安天子幸蜀太子即位於靈武明年皇帝移軍鳳翔其年復兩京上皇還京師於戲前代帝王有盛德大業者必見于歌頌若令歌頌大業刻之金石非老於文學其誰宜為頌曰

噫嘻前朝孽臣姦驕為昏為妖邊將騁兵毒亂國經羣生失寧大駕南巡百僚竄身奉賊稱臣天將昌唐繫晚

我皇匹馬北方獨立一呼千麾萬旗戎卒前驅我師其  
東儲皇撫戎蕩攘羣寇復服指期曾不踰時有國無之  
事有至難宗廟再安二聖重歡地闢天開蠲除妖災瑞  
慶大來克徒逆儔涵濡天休死生堪羞功勞位尊忠烈  
名存澤流子孫盛德之興山高日昇萬福是膺能令大  
君聲容沄沄不在斯文湘江東西中直浯溪石崖天齊  
可磨可鐫刊此頌焉何千萬年

鳳翔出師紀聖功頌并序

楊炎

舜有兩階之舞周有孟津之會皇帝有岐陽之蒐德莫  
勤乎安國勛莫配乎立極利萬物莫近乎去暴蓋受天  
元符與人請命冥契相合億兆有歸以唱則感神鬼之  
心以征則去雲雷之難維唐七葉姦臣犬吠於二京皇  
帝龍鳴於河北觀兵雍上建都發號以朝萬國心嚮天  
地志通幽昧淳精四達大造玄成於是巢山駕海之羣  
狼羆鳥章之君不期而趨于闕下者四十有三萬元帥  
廣平王俶太尉光弼司徒子儀等稽首言曰臣聞天啓

聖以俟時聖感時而赴難非神功不能當大運非玄德不能合人心故軒轅之道也伏蚩尤宗周之仁也稱襁負陛下之德大瑞於人和人和而動天天與和合氣百姓因之以獨化四夷因之以子來王師德之以貞勝意者河洛徯怨後東征之期人靈駿奔望西狩之禮天子方齊寶輅講金匱之書翌日霓旌武賁大車之輪黃鉞靈鼉彤弓太阿荆韓楚魏之廣七閩五獠之長金鼓百萬車徒九合大陣于東郊皇帝建白麾以誓于軍曰維



高祖歆于上天四宗重光照臨下土百有五十祀至于  
聖皇總武之干戈備文之法象最爾逆虜敢迷天紀盜  
我符璽黷我威靈使四海之內兵革縱橫肝腦塗裂昊  
蒼降鑒錫命於予俾續夏已墜之功寬堯未刑之族於  
戲余匪玉帛山河是愛惟蒼生災害是憂匪天命威力  
是憑惟人心忠義是保咨爾張目成天羅植髮成干櫓  
布和成將帥厲氣成風雲若作進退爾惟旗鼓若斷首  
尾爾惟常蛇若戮鯨鯢爾惟干將若拯沈溺爾惟巨艦

夏有一旅之衆周有十人之誓志定金石信非盟誓爾  
其念哉是時天威動六合兵氣連太白乾坤為之塊軋  
河嶽為之震蕩彼孤鳴鑿齒之徒不崇朝而聲反於謳  
歌形歸於蹈舞者幾過半矣故鄴社之師以形勝灞上  
之克以威逐桃林之陣以奇破河洛之孽以氣摧帝乃  
開天牢迴豹尾陵顥氣鎖欃槍應龍秉鉞玄女侍坐乃  
考夏氏配天之義備漢皇建武之興雲髦玉輅山動地  
踊降自西雍幸于京師萬姓前導百靈為衛布德澤望

陵寢悲黍稷之將秀覽城闕之為墟以雷雨洗川澤以  
皇風清怨怒以大賞議勤勞以成功告宗廟以詳明去  
靜昧以惠政哀困窮清蹕而奉聖皇稱觴以朝前殿於  
是東國耆老長安士庶排御輅於天庭動千門呼萬歲  
煙雲下遶林藪山迴神靈頌於堂精鬼感於廟王侯慶  
於國父子洽於家鍾石反於懸壘俎陳於席華戎踴躍  
喜氣磅礴日退三舍天聲萬里神謀不得窺其奧天道  
不能後其時斯一會之畧也然後動變化為鑪假仁義

為途陶氣象鑿耳目與神合同契以道浸澆醅全屏象  
之形斷珠玉之脛然後以景星燭夜甘露清氣昇閭風  
對天老捨鴻名以還太素垂大歷而統人紀俾不思而  
降不祭而歆以元和感生淳古於是宰臣聚而言曰主  
上以神武清難至德遂人崇勛絕瑞光照萬古闢開日  
月于今六年百姓豈忘力於帝乎人臣盍謝生於天乎  
請相與鑿石於誓師之場告成於得衆之地斯王道之  
盛典臣炎稽首敢獻頌曰

天命帝兮蕩妖昏交風雨兮會秦門惟聖德兮漫海外  
五單于兮勇士會俗鳥獸兮家雲鳥越浮山泛青草徵羽  
騎兮列天營啓金滕兮賜長纓日為車兮雷為鼓醢鯨  
鯢兮掃煙雨開明堂兮饗文祖帝為皇兮后為母歌雲  
臺兮冊玉府篆穹石兮駕終古

大唐河西平胡聖德頌

并序

維唐至德二年春正月武威郡胡洎九蕃夷落內伺師  
旅之間外合狼豕之兇據金城害州伯蛇變交戰之下

炎焚大澤之中二月乙丑皇帝以五命之服詔太僕崔  
偁總中權專上將誓軍前之士郤城下之盟又命內常  
侍劉日新振鼓鐸之音護羌戎之長林竦蜺合會于東  
郊粵庚午高牙大旆鐵馬長鑊鼓以清笳陣以雲蛇列  
于四衝蓬頭執戟鼓以靈鼉進于達路趨悍獷猱虎裘  
蟻臂北陵于土門之隊鉤車雲梯强弩堅楯齊傳于西  
烽之亭於是引熊虎之師杖龍蛇之劍矛戟四起烟塵  
火色金鼓一振天地徘徊血亂玄黃聲囂瓦屋是風雲

皆入陣彼草木盡為兵日月垂照於窮鄉皇靈赫臨於  
天外名王貴馬大玉文貝素女錦衣百金之產萬井之  
資皆委于八貢之府市于有地之宮是時也千人踊萬  
人賀美太階之符見頌偃伯之議興特進金城太守李  
葛頃洎五邑長吏軍正大夫等言曰蓋聞王命先天以  
奉時賢臣合統以偕運靡垂乎帝錄不能撥亂因應乎  
間氣不得遭逢故大人之作必先靖難以摧克取暴為  
治國以任賢使能為建功磅礴乎茅茨之下歲蕤乎玄

古之上斯軒轅得之以勝蚩尤大夏得之以勝有扈西  
伯得之去殷伐崇太宗得之奄有遼海上皇得之克平  
巨猾陛下得之再清宇宙掃蕩氛蠻允若大唐之新命  
復高祖之天下臣等恭惟六聖騰光百有五十祀周賁  
海寓鋪敷茵蕡丹穴之賁孤竹之君金闕括羽委命下  
吏陛下建大號纘鴻業歸勛祖禰昭事聖皇是必天錫  
忠良佐成命器二臣所應皇運之統伏崇羽之亮太康  
西人永永來裔願篆石誌美以為頌云



詔虎臣兮殪天狐載火旗兮耀昆吾霽塵壘兮被戎都

獻平淮西雅

并表

柳宗元

臣某言臣負罪竄伏違尚書牋表奏十有四年聖恩寬宥命守遐壤懷印曳紱有社有人

云云

伏惟睿聖文武

皇帝陛下天造神斷克清大憝金鼓一動萬方畢臣太平之功中興之德推校千古無所與讓臣伏自忖度有方剛之力不得備戎行致死命況今已無事思報國恩獨惟文章伏見周宣王時稱中興其道彰大于後罕及

然徵於詩大小雅其選徒出狩則車攻吉日命官分土  
則嵩高韓奕蒸人南征北伐則六月采芑平淮夷則江  
漢常武鏗鉤炳耀盪人耳目故宣王之形容與其輔佐  
由今望之若神人然此無他以雅故也臣伏見陛下自  
即位已來平夏州夷劍南取江東定河北今又發自天  
衷克翦淮右而大雅不作臣誠不佞然不勝憤踊伏  
以朝多文臣不敢盡專數事謹撰平淮夷雅二篇雖不  
及尹吉甫召穆公等庶施諸後代有以佐唐之光明謹昧

死再拜以獻

平淮夷雅二篇

皇武命丞相度董師集大功也

皇者音其其武于激于淮既徒既車環蔡其來狡衆昏嚚

其毒于醒狂奔呌呌以扞大刑皇咨于度惟汝一德曠

誅四紀其猷汝克錫汝斧鉞其往視師師是蔡人以宥

以釐度拜稽首廟于元龜既類既禡于社是宜金節煌

煌錫鎬彫戈犀甲熊旆成命是荷度拜稽首出次于東

天子餞之壘尊是崇鼎臠俎載五獻百籩凡百卿士班  
以周旋既涉于涯乃翼乃前孰圖厥猷其佐多賢宛宛  
周道于山于川遠揚邇昭陟降連連我旆我旗于道于  
陌訓于羣帥拳勇來格公曰徐之無恃頌頌式和爾容  
惟義之宅進次于郾彼昏卒狂衷兌鞠頑鋒螭斧塘赤  
子匍匐厥父是亢怒其萌芽以悖太陽王旅渾渾是佚  
是怙既獲敵帥若飢得餉蔡克伊宮悉起來聚右擣其  
虛靡愆厥慮載闢載被承相是臨弛其武刑諭我德心

其危既安有長如林魯是謹饒化為謳吟皇曰來歸汝  
復相予爵之成國昨以夏墟度拜稽首天子聖神度拜  
稽首皇祐下人淮夷既平震是湖南宜廟宜郊以告德  
音歸牛休馬豐稼于野我武唯皇永保無疆

皇武十有一章章八句

方城命懃守也卒入蔡得其大醜以平淮右

方城臨臨王卒峙之匪徼匪競皇有正命皇命于懃往  
舒余仁轔彼艱頑綦惠是馴懃拜即命于皇之訓既厲

既攻以後厥刃王師嶷嶷熊羆是式銜勇韜力日思奮  
殲寇昏以狂敢蹈愬疆士獲厥心大袒高驤長戟酋矛  
絜其緩章右翦左屠聿禽其良其良既宥告以父母恩  
柔于肌卒貢爾有維彼攸恃乃傾乃誘維彼攸宅乃發  
乃守其恃爰獲我功我多陰謀厥圖以究爾訛雨雪洋  
洋大風來加于燠其寒于邇其遐汝陰之茫懸瓠之峨  
是拔是震大殲厥家狡虜既縻輸于國都示之市人即  
社行誅乃諭乃止蔡有厚喜完其室家仰父俯子汝水

沄沄既清而瀾蔡人行歌我步逶遲蔡人歌矣蔡風和  
矣孰類蔡初胡旣爾居式慕以康為愿有餘是究是咨  
皇德既舒皇曰咨愬裕乃父功昔我文祖惟西平是庸  
內誨于家外刑于邦孰是蔡人而不率從蔡人率止惟  
西平有子西平有子惟我有臣疇允大邦俾惠我人于  
廟告功以顯萬方

方城十章章八句

聖政紀頌

并序

來鵠

穆宗皇帝臨大朝與羣臣言奏政事羣臣退而宰臣奏  
曰陛下問及平政事此三皇五帝之所徽美也陛下不  
問及史臣此三皇五帝之所弭已也徽美者將有乎聞  
也弭已者將有乎亡也以聞之而又亡之則陛下徒有  
宵衣旰食之名規天條地之績與羣臣言後若飈然拂  
冠過冕湮時銷日無得用於後譬如十夫樹楊一夫拔  
之無得以成其大也政事羣臣得陛下日問之是十夫  
樹楊也史官執筆為陛下日遠之是一夫拔楊也使後



之人訝聖朝空晨虛夕閭殿曠廷無君臣咨謀洋溢之言乏社稷安危強諫之說是不亦遠史臣致不載其事如拔去其楊將弭已之謂乎臣伏念貞觀永徽之代百官之有耳目但聽視天子而已故言事者安論紆詞無疑權慮勢史官執筆于階之下天子側旒于殿之上奏者發誠于廷之中是以正衙一開則臣誠前而啓之帝旒近而鎮之史筆隨而絡之由是君臣謀國圖政之事喻機都要之言詫業發神豐編照物偕籍于堯典差光

于天陽至今見太宗文德若三皇五帝之所徽美也自  
永徽之後宰執不正窺伺是忌針棘前後阻越對駭狼  
噬虎飡持膏銜肉蓋以言多為已曾不致君內荏失中  
畏使人聽乃奏史官與百僚俱退然後宰臣請事由是  
君有問而宰臣知之史官不得與於聞君有舉而宰臣  
謀之史官不得記其事次第周行檢錄制誥與冗吏同  
工而已臣嘗涕泣以歎豈有以一己之細一性之忌於  
泰畧圭景之間苟嗜急須迴天遮上使聖緒神緒有嘉

歇善諷罔得聞於千萬年枉有謂明朝空晨虛夕閒殿  
曠廷無君臣咨謀洋溢之言乏社稷安危強讜之說若  
今踵而承之則不唯臣有障聰蔽睿之刺抑陛下雖有  
三皇五帝之所徽美而若遠史臣則三皇五帝之所弭  
已也抑又有一夫拔楊之謂歟臣請史官執筆當羣臣  
奏事隨日撰錄號為聖政紀臣立朝荷祿幸甚穆宗皇  
帝動宸頷旒憮然歎曰吁朕罔敢粉名厥後乃罔知厥  
後然聖人存簡策者亦非以粉名也蓋存乎大國之典

鴻祖之業我國有典我祖有業業在于典典在于史曷  
厥史不書是尸余于祖涸業于典也朕纘承聖緒恭惟  
恪思將念厥政未嘗不離安廢酣馳荒鴛遠是以每與  
宰臣言如簇天下一巡省每見宰臣退而展天下盡聞  
知豈圖臣蓄猾謀公無同事欲弄尾舌先衛巖穴隔斥  
史臣占佞明后致懿摛嘉訪不存堯典之書善諷名猷  
莫出清廟之什史臣負我不舉其官宰輔盡忠厥聞有  
此由是詔史職執史筆立于廷之下錄君臣臚句之必

行載剛毅進退之敢議題其篇目曰聖政紀也至上之  
即位三年有鄉校小臣來鵠居山澤間常私心重惜史  
臣以其史臣者是當國之鏡千億代之眚目也因窺穆  
宗實錄得解憤釋嫉於立史官為聖政紀者追而頌出  
其事以鑒今之廷列故拜獻其頌曰

三皇不書五帝不紀有聖有神風銷日已何教何師生  
來死止無典無法頑肩冐比三皇實作五帝實治成天  
造地不昏不圯言得非排文得聖齒表表如見者莫若

乎史是知朴繩休結正簡斯若君誥臣箴觚編毫絡前  
書後經規善鑒惡國之大章如何寢略嗚呼貞觀多什  
永徽多俞廷日發論殿日發謨牙孽不作烏鼠其除論  
出不蓋謀行不紆楹然史臣蛇然史裾瞠瞠而視逶逶  
而婁翹筆當面決防納污不桎爾智不席我愚執言直  
注史文直敷故得粲粲朝典落落廷謨聖牘既多堯風  
不淺頒編坦軸君出臣顯若儼見旒若俯見冕無閒殿  
曠廷無尸安素晏三皇不亡五帝不翦太宗得之史焉

斯展暨乎後相圖身天子專問我獨以言史不得近立  
明見嫌倚相在擯秉筆如今隨班不進班退史歸惘然  
疇依奏問莫覩嘉謀固稀取彼誥命祿為國肥烱哉時  
皇言必及章德室五帝道與三皇如何翊臣嚙肉嗜益  
甯距磨快福衡物長控截僚位占護陽光垣私藩已遠  
近庾唐俾德音嘉訪默縮暗亡咽典噤法蓋聖籠昌曷  
以致此史文不張後必非笑將來否臧謂乎殿空宸逸  
朝憎廷荒不知姦蔽文失汪洋有貞觀業有永徽綱亦

匿匪見亦寢匪彰賴有後臣知言不佞伊尹直心太甲  
須聖事既可書史何不命乃具前欺大陳不敬曰逐史  
之喻請以物並且十夫樹楊一夫欲競栽既未牢摒豈  
能盛帝業以裁逐史似摒穆宗憮然若疚若營何昔臣  
斯隱我祖正不傳親問不寫密諍孰示來朝以光神政  
由是天呼震爰徵奔召急史提筆來叱廷而入端耳抗  
目不撓不挹解旁側頭螭蚪擺漚握管絕怡當殿而立  
君也盡問臣也倒誠磊磊其事鏜鏜其聲大何不顯細



何不明語未絕緒史已錄成錄成謂何書政紀名伊紀  
清芬可昭典墳古師鳥官昔聖官雲方之我后錄里書  
分錄有君法書有君文君法君文在聖政紀云殿無閒  
時廷無曠日雲諏波訪倦編刊筆君劬臣勞上討下述  
惟勤惟明在聖政紀出至德何比至教焉如孰窺孰則  
外夷內儲謂君有道乎臣有謨歟有道有謨在聖政紀  
書一體列秩同力翼戴析福去枚絕防無礙國章可披  
唐文可愛善咨不偷嘉論不蓋不偷不蓋在聖政紀載

諒夫揔斯不朽可懸魏闕愚得是言非訕非伐實謂鑒  
臣渾沌開君日月妖物零死天文光發惟我之有頌兮  
奚斯躍而董狐魔

德勝頌二章

并序

歐陽詹

唐貞元六年歲在庚午陰陽家流曰歲在午人馬食土  
人之所食也穀馬之所食也草今言食土明歲無嘉穀  
而野無青草則運數于茲合凶災之大者於是天尋舊  
步地轉恒軸交糾迴薄將有結于常沴自春二月至于

夏五月或赫日杲杲或密雲溶溶為焦灼為霖霖似  
不日而至皇帝宿布大和人神鳥獸魚鼈咸若騰歡  
心揚喜雲欣欣熙熙休氣中積浹磅礴浮蒼蒼潛相  
戛磨力强者勝九陽構旱而莫展六陰作潦而不就  
氛祲靄為慶雲烈景暉為祥光油油薰薰宛復如春  
塊不破而雨足條無聲而風暢日者生氣欲凝淑氣  
猶競彼雖罔得為禍此亦未能為福徘徊相持時澤  
不降五稼含萌而待藝百芳蓄穎以思圻至是土膏

融甘液宣若決渟泉如開涌烟豐本增岐芄芑歸繇  
無磽塉與良沃獲一十於百千賸蔬雲蠹以委圃餘  
糧嶽峙而栖畝夫體病不能害心心平必能制體古  
人曰人者天地之心也既和且平則天地之病又焉  
得成歟況奔走游泳之物曰靈曰祇之類皆吁歆怡  
逸於其中乎宜其燎乾元之宿痼愈坤元之常疾以  
至於交泰如斯之盛邪古先帝王至聖則堯至仁則  
湯有黎暍以稱理厯水旱而莫禦豈不以道未全洽

而德尚涼哉皇帝非徒能禦之又易之為大慶殊祥  
其於道德可謂充塞洋溢光今而邁古矣元元嗚咽  
歌聖代者動天殷地以夜繼晝而其詞未宏輒為頌  
二章用貽于康衢庶事明而聲暢流乎無窮而以德  
勝目篇頌曰

歲在午天災於常昔人食土今我飫梁匪徒我飫梁  
鰥寡千箱盛矣乎我皇之德變青為祥休哉德兮

歲在午天災斯屬昔馬食土今牛饜菽匪徒牛饜菽

大豕梁肉盛矣乎吾皇之德轉禍為福休哉德兮

歲星居心頌

權德輿

皇矣上帝降鑒下人后王承之制作禮文人用明德  
家尚孝仁人無腐疵俗以阜蕃敷佑四方發為天祥重  
華煌煌乃居明堂下煦仁澤上為祥光回復感通天  
人攸同乃法五事乃建大中君君臣臣德輝昭融保  
祐命之自天無窮微臣頌歌敢備唐風

伯夷頌

韓愈

士之特立獨行適於義而已不顧人之是非皆豪傑之士信道篤而自知明者也一家非之力行而不惑者鮮矣若至于一國一州非之力行而不惑者蓋天下一人而已矣若至於舉世非之而不惑者則千五百年乃一人而已耳若伯夷者窮天地亘萬世而不顧者也昭乎日月不足以為明萃乎泰山不足以為高巍乎天地不足以為容當殷之亡周之興微子賢也抱祭器而去之武王周公聖也率天下之賢士從天下之諸侯而攻之

未嘗有非之者也彼伯夷叔齊乃獨以為不可殷既滅矣天下宗周彼二子乃獨恥食其粟餓死而不顧由是而言夫豈有求而為哉信道篤而自知明也今世之為士者一凡人譽之則自以為有餘一凡人沮之則自以為不足夫彼獨非聖人自是如此夫聖人乃萬世之標準也余故曰若伯夷者特立獨行窮天地亘萬古而不顧者也雖然微二子亂臣賊子接跡于後世矣

唐文粹卷二十



欽定四庫全書

唐文粹卷二十一

宋 姚鉉 編

頌丁

政德 總一十首

古賢宰一

虞子賤碑頌

賈至

良牧三

廣州都督嶺南按察五府經畧使宋公遺愛

碑頌

張說

京兆尹張公德政碑頌

王維

唐衛尉卿洪州都督張公遺愛碑頌

崔祐甫

興利三

復練塘碑頌

李華

高陵令劉公遺愛碑頌

劉禹錫

蘇州嘉興屯田紀績碑頌

李翰

靈跡一

唐天台山新桐柏觀碑頌

崔尚

高道一

唐中嶽體玄先生潘尊師碑頌

陳子昂

宗理一

長明燈

高邁

虛子賤碑頌

賈至

清靜致理中庸之德至高明柔克簡易之體大繹微旨  
而徵遺論何先生道蔚其歲蕤者也先生宣慈在躬精

義入神德順乎天性根於仁殷其如雷曖然如春始受  
業於仲尼終委質於魯君爾乃周道凌遲王風哀思夷  
狄竊於位號干戈亂於原野則我魯國無齊晉之強定  
哀非桓文之主三卿有僭虐之政先生處此亂邦從之  
理邑平心氣而全耳目晏然躋富壽之域焉自非知微  
知彰變化無窮孰能臻此觀夫為政之大體元之要恤  
孤哀喪舉事問弔訓之以悌加之以孝備五更而悟君  
賢三老而稟教然後燕居以佚其體張樂以和其人夜

漁不戒而信欺吏不威而息是以宣尼惜君之理小子  
期間君之政暇何其遠哉向使移於有國之君則陶唐  
之理也施於有政之臣則二南之化也昔舜左禹而右  
皋陶不下席而天下理周公散膳在御不解懸而四夷  
伏小大則異其揆則同天寶初至始以校書郎尉于單  
父想先王行事徵其頌聲而古碑殘缺苔篆磨滅使立  
志之士何以揖其遺風焉嗚呼其道存而其事往其人  
亡而其政息哀哉遂作頌曰

鳴琴湯湯處子之堂清靜無為邑人以康澆風化淳霸  
俗致王誰謂陽鱗革而為魴鰠鰠黃髮或師或友芄芄  
麥苗不稂不莠齊師已卻魯俗斯阜諫或剖心伊人引  
肘穆穆伊人希聖之才堯舜既往孰為來哉從時卷舒  
與道徘徊游泳孔門取容定哀泱泱千古顯顯令德聲  
隨攸牧惠與順息人亡政弊道播神默寂寥夜川惆悵  
舊國荒祠尚掃苔篆將磷尋風聆韻想見其人年代邈  
殊精誠闇親再表貞石頌聲惟新

廣州都督嶺南按察五府經略使宋公遺愛碑頌

張說

維唐御天下九十有八載蒼生賁乎海隅玄澤漫乎荒  
外天子念窮鄉之僻陋徼道之脩阻吏或不率不馴人  
或不康不若乃命舊相廣平公宋璟鎮茲裔壤式是南  
州篤五管之政教總三軍之旗鼓幅員萬里馴致九譯  
詔書下日靡然順風曷由臻斯威名之先路也公曩時  
執白簡登瑣闥推誠謇諤不私形骸忤英主之龍鱗踰

奸臣之虎尾挫二張之銳則聲恒寰域折三思之角則  
氣蓋風雲由是極有四星維帝之輔地有五嶽維天之  
柱其出宰也君之股肱其出守也人之父母至於此邦  
之長人也飲食有節衣服有常清心而庶務簡正色而  
羣下一瑟兮憫兮赫兮咍兮固以不怒而威不言而信  
雖有文身鑿齒被髮儋耳衣卉麤木巢山館水種落異  
俗而化齊言語不遁而心喻矣其率人版築教人陶冶  
室皆斲葬晝遊則華風可觀家撒茅茨夜作而災火不



發棟宇之利也自今始祖國之舶車海琛雲萃物無二  
價路有遺金殊喬胥易其迴途遠人咸內我邊郡交易  
之坦也有如此故能言之士舉為美談蓋微子去殷以  
後王者襄公伐楚將得諸侯尚書東漢之雅望黃門北  
齊之令德宋氏世名公其濟美詩所謂無念爾祖聿脩  
厥德廣平有焉若夫往者屈也來者伸也往來相召而  
哀樂繼之鴻飛蓮渚於汝信處龍章袞衣以我公歸鬱  
陶乎人思嗟歎之不足廣府司馬譚環畚耒耜老其乙

等相與刻石傳徽斯文予春秋之徒也豈將苟其辭哉  
雅敬宋公王臣之重次嘉譚子贊德之義遙感耆舊去  
思之勤越裳變風知周公之才之美吉甫作頌見申伯  
平藩于宣觀政將來惡可廢也頌曰

降王宰兮遠國靈歌北戶兮舞南溟酌七德兮考六經  
政畫一兮言不再草木育兮魚鼈寧變蓬屋兮改籬牆  
魚鱗瓦兮鳥翼堂洞日華兮皎夜光火莫炖兮風莫颺  
事有近兮患無疆崑崙崙寶兮西海財幾萬里兮歲一來

舟如鳥兮賃為臺市無欺兮路無盜旅忘家兮扃夜開  
越井岡兮石門道金鼓愁兮旌旆好來何暮兮去何早  
爆牛牲兮菌雞卜神降福兮公壽考

京兆尹張公德政碑頌

并序

王維

雲從龍風從虎氣應也聖人作賢人輔德同也君臣同  
德天也通氣以康九有以遂萬類惟皇御極二十載光  
格四表至于海隅日出越小大邦蠻貊師長罔不欽于  
成憲以承天休然天子猶日省三接列辟日聽萬方輿

頌懼人有未化賢有未登故敷仄陋兼乎十等選宗室  
及乎九族任事以觀材積時以觀行乃得我賢京兆馬  
夫京兆號為難理清淨病於不給刀筆拘於守文或以  
輒弱廢或以殘賊劾把宿負淺為丈夫用鉤距蓋非長  
者我則異於是大道難名大理無法閉關於任數巧算  
不能知堅壁於畫一善取不能下摧宿豪如薙草無愠  
色視大權如厯塊無傲容百司之吏總一德以咸服五  
方之人雜異教而同理受命之始先聲已振黠吏惡少

聞風族行及乎鳴騶詣府登堂坐定縣尹掾吏以次上  
謁守正之人其氣高含章之人其詞大見容色而聞號  
令小人感而君子泰日者櫟陽男子閭里為豪借客報  
仇聚人為盜或白日手刃或黃塵袖鎚政寬則以身先  
諸偷操急則以事中長吏貳過不已萬計自脫公命吏  
縛之立死鈴下於是人入閭室若遇大賓焉前年不登  
人賴太甚野無遺糠路有委骨天子不忍征於不粒賦  
於無衣六軍從衛以臨東諸侯息闕中也帝曰咨天其

降威人罔畏罪台恐寇盜乃邑矧曰蕩析離居惟爾克  
濟撫茲西土公拜稽首思塞休命布慈惠之政不以利  
淫震雷霆之威其或有過饗人減雙雞之膳圉人省五  
馬之秣洵不獻服圻不填棺自身已往振廩同食雖人  
烟不動道殣相望不思濫以苟生咸守教以就死是不  
可能也先是王公或專南山之利司農涸昆明之池收  
赤岸澤將為田以便官至是悉奏罷之舟漁衡麓之守  
廢蒲荷新蒸之產人自郊徂邑室有魚殭斬陰伐陽市

多山木人得以瞻惟涇有防比歲多決近縣疲於力役  
他山遺於度材公命刮朽壤填巨石辦大木去編管其  
始告勞乃終有慶匠石日減功萬歲史日省錢億農始  
學耒女始安織於是鮐背黃髮之耆曰我有田疇鍾秉  
其畝我有子弟顏閔其行鄉黨以睦悖失其獨道路有  
禮汰無與爭酒先養老賄不問吏既無吠狗亦無奸人  
臨年餘資竊蒙惠化其曷以臻茲君子曰此天子至公  
內舉不避親錫汝明尹張公之力也夫公於國為外戚

於帝為外弟重組累印珥香貂者七葉奉車駙馬乘朱  
輪者十人勝衣則綺襦紈袴通籍則玉墀青瑣動則兩  
駟如舞坐則五鼎成列文軒楚製素女趙舞而公儼兮  
其若容淡兮其無味心在四教語稱七德目視六籍口  
誦九歌懷君子令德之忠保詩人錫類之孝悌有過於  
共被慈有踰於含食惡衣以居公服不敢降也屈體下  
士王綱不敢替也協二姓之好以正人倫徇無嬖御分  
一人之憂以審王政下多英傑若夫皇帝敬問之詔御



札自書天王命賜之衣上官所製勤勞則中使接武計  
議則走馬來朝豈惟衆臣重其經術為吏雜以儒雅而  
已且公之德升聞于天非一朝一夕之漸也亦以稱職  
於累官著聲於所在其丞秘書也闕文遺簡多在大家  
深為子孫之藏密有緘滕之固公不憚權貴或抵或誘  
盡歸天閣官書備焉其牧郢人也人有不若德戮之不  
為暴人有不保居撫之不為謫存者考其事壯其食以  
畜之行耑緝其官藝其樹以待之此邦之人既優他邦

之人又至焉未盈一歲遂增萬戶其守汾也仍歲大旱  
郡祠介推雖屢舞僂僂而靈應未若公命束蘊取火伐  
樹實薪釀酒而祝曰有功於人祀為明神無德而祿禍  
亦覆餗自絳已來人實祀子純犧大璧不敢愛必以薦  
也童兒季女不敢黷必以敬也神既靡吝人將安仰若  
亭午而雨則樹其鷺羽執此騂毛不然者火燎將至炊  
天鑠地靈衣且為煨燼豐屋將為茂草爾其圖之言未  
畢而雲興拜未起而雨降周於闔境不入他郡雖封疆

咫尺而彼竭我盈嘻若記能事載盛德渭川之竹不足  
簡終南之木不足軸夫訓人至於禮儀曰德安人免於  
阽危曰功德者上賞於上下頌於下長老孜孜願刊于  
石以予學於舊史來即我謀且維與人編戶與人為伍  
與人出入與人言語知風俗之淳弊識政化之原本屬  
詞媿文書事蓋實詞曰

五代相韓七葉侍漢及我聖朝亦生邦翰大道無形貞  
蠱以幹含章不耀在割能斷情偽萬端吾道一貫帝選

賢尹無以易張金印紫綬京兆之章佩我鳴玉冠我兩  
梁天子休命拜首以將寬而愛人立滅暴強明明天子  
哀此南畝將息西入遂覲東后我教我訓我鎮我守茫  
茫三秦則固餬口守死以義徇生不苟王曰外弟視人  
不佻何以寵之手書以詔何以問之賜衣而朝俾人華  
胥致君帝堯刻石作頌永世彌昭

唐衛尉卿洪州都督張公遺愛碑頌

并序

崔祐甫

今天子終諒闇易月之期不言既言之日詢于師保輔弼之臣曰將以國之明燭震下士俾兆人康乂有道哉四臣曰莫如擇賢而司牧之雖欲不理不可得也上曰用賢何先四臣曰莫先於幽遠蠻貊之邦為急也即日命王人遽以制書就拜衛尉卿兼洪州都督張公為御史中丞廣州刺史嶺南節度經略觀察等使既踰月而遽居于洪洪之耆老嫠惇商販漁釣百類千品周聲奪魄于野于廛咸曰寧取我裳而裂之寧取我廩而焚

之父也天只胡為奪我之君中丞受命而南舟不及汎  
馬不及秣國人懷慕之罔極曰清塵遠矣君不顧矣鬱  
陶之思何用哉盡用於揚名頌德乎故吏兵曹叅軍張  
擢法曹叅軍豫章縣令鄭鋒建昌縣令盧惟瑾新吳縣  
令鄔賁州人東治府果毅劉容者壽喻乾相等討論之  
衆僉曰允於心曰自昔為政者知清之可以長人也而  
清者稀豈不欲清欲牽之也欲之所行不廉不儉為之  
舟輿也清之不立肆奢崇貨為之鑽鑿也於是撤其帷

帳薦辱之具便於身悅於目者二百餘物歸之有司減其俸錢稍食月幾十萬實於軍府此皆前政之所督觀而封已者我則推而遠之於是公儀之義申平仲之規見矣二之日謀於衆曰昔曹叅去齊以獄市為寄以為擾於獄者輕重人之命煩於市者耗斂人之生苟鞭笞桁楊之無度侵牟肆奪之不改是國家以章綬印璽毒蒼生也豈致理哉於是平百貨之貴賤議刑罰之等差使其貪不下殘忿不私逞韓子求環而不可使人袒背

而無傷夫然噬嗑之象成行葦之恩溥矣三之日謀於  
野曰不稼不穡民天安仰載馳載驅王命所急吾觀是  
邦農野未闢傳置未修豈不以使役無期供億失序儻  
野有餓殍賓不如歸亦諸侯之恥也於是減承城吏卒  
幾三千歸之隴畝而擊柝之守無闕焉賦豪端財數百  
萬賜于館餼而舍糗之徒不知也其卒也不公之吏留  
以為廝其財也不法之臣受以潤屋我皆用之於愛人  
活國也於是阜藩之望崇多大之儀備矣從政三日州



人愛之如父母承之如松柏夫婦耕織之暇無他懼惟  
懼公速遷其餘煦嫗孕育發於中而形於言損其身而  
益於物可以激積俗慰窮甿者豈勝道哉祐甫山東鄙  
人不好佞飾凡所聞見務存實錄故採拾而書之公名  
休字祥幽州范陽縣人有晉司空茂先之遠裔也魯祖  
汲易州長史祖選幽州固安縣丞考價贈齊州司馬公  
起家石亭別將自是為縣令軍司馬州長史各一人為  
天子友儲君臣雖假以寵名而跡實戎索受命為范陽

節度安祿山判官祿山以大權大寵外示忠而內謀逆  
太上皇推赤心而勿疑最有間之者死蹈虎尾犯龍鱗  
公密言其戎狄豺狼不可厭也當是時也視鼎鑊如歸  
馬神之聽之是與正直周旋鋒鏑之下出入寇讎之間  
而能終保元吉漸干貴仕進退存亡而不失其正其惟  
張公乎又牧豪舒潤三州而及此昔張黃門庭珪牧此  
州甚得人譽張丞相九齡次之逮府君又有裕焉故邦  
人有三張之目頌者美盛德之形容非魯僖公仲山甫

不之獲今茲頌曰

昔為豫章故有循良黃門之善于今不忘爰及丞相亦有烈光我君戾止是為三張立廉實儉無怨無傷郵亭之下賓旅其康四封之內望歲千箱自春徂夏兮人相慶慶未畢兮聞後命朱轡玉節兮向蕃禺彼願適兮我望孤君乎君乎若歲大旱其誰見濡

潤州丹陽縣復練塘頌

并序

李華

大蜡之祭辭曰土反其宅水歸其壑先王因流下而導

之故曰九川滌源因迤匯而瀦之故曰九澤既陂以疏  
天地之氣以利元元之用崇伯汨五行而殛羽山臺駘  
章大澤而封汾川洪範首之春秋載之地有廣狹事無  
今古大江鉅區惟潤州其藪曰練湖幅員四十里菰蒲  
菱芡之多龜魚鼈蜃之生厭飫江淮膏潤數州其倚大  
族强家泄流為田專利上腴畝收倍鍾富劇淫行自丹  
陽延陵金壇環地三百里數合五萬室旱則懸耜水則  
具舟人懼其害九十餘祀凡經上司紛紜與奪八十一

斷嗚呼曲能掩直强者以得之老幼怨痛沈聲無告永  
泰元年王師大翦西戎西戎既駢矣生人舒息詔公卿  
選賢良先除二千石以江南經用所資首任能者是歲  
十一月二十三日拜前常州刺史京兆韋公損為潤州  
聲如飈馳先詔而至吏人畏伏男女相賀即日上無貪  
刻下無冤憤公素知截湖閭壤災甚螟螣臨事風生指  
期以復羣謗雷動山鎮恬然中明獨裁文之以禮乃白  
本道觀察使兼御史中丞韋公元浦中丞撫掌愜心如

公之謀且曰興利除害待其人而後行非常之政敢歸  
叔父公乃申戒縣吏卒徒闢之人不俟招呼而從役畚  
鍤蓋野浚臯成蹊增理故塘繚而合之廣湖為八十里  
像月之規傳金之固水復其所如鯨噴射洶洶隱地雷  
聞泉中先程三日若海之彌望瀨瀨如吞吐日月沈沈  
如韞蓄風雨所潤者遠原隰皆春耕者飽憂者泰於是  
疏為斗門既殺其溢又支其澤沃壻均品河渠通流商  
悅莫價人勇輸賦遐邇受利豈惟此州每歲萌陰垂陽

二氣相薄大雨時行羣潦奔流水勢所入盈而無傷龍  
見方雱稼蒙其渥時前相國彭城公劉尚書晏統東方  
諸侯平其貢稅聞而悅之白三事以聞詔書褒異焉彭  
城公宣命至江南捧詔授公公率元僚掾史令丞已下  
至于耆艾西向拜手忻戴皇明人心上感天降嘉澤如  
有神祇昭協厥至公正直而和專靜而斷嫉惡宥過惠  
人察奸純鈞精堅百鍊不耗伐冰之貴降從士禮詩云  
靖恭爾位好是正直宜其享福也吏人入賀公拱而謝

之曰尚書劉公觀察韋公奉行王澤也鄙何力之有焉  
丹陽令杜孟寅秉公之清白延陵令李令從如公之愛  
人金壇令胡玘稟公之成規及丹陽耆壽周孝璩百姓  
湯源等拜首而請曰兄為澤悅也水歸於澤而澤悅  
於人百年浸塞而公啓之臣哉隣哉克諧帝休永代是  
式三縣無災若不碣而刻之則王命不揚於厥後後之  
人無以倚負也華嘗學古見訪為頌曰

望沄沄兮視冥冥鳥聞魚樂葭莢生膏腴利倍起訟爭



斯人怨抑痛無聲韋公正直動神靈百年游淀為溲清  
飢者飫兮病者寧詔書光寵恩霈然眊矐復皎明  
追琢刻頌揚茶馨

高陵令劉君遺愛碑頌

并序

劉禹錫

縣內之大夫鮮有遺愛在其去者蓋邑居多豪政出權  
道非有卓然異績結于人心決于骨髓安能久而愈思  
大和四年高陵人李仕清等六十三人具前令劉君之  
德詣縣請以金石刻縣令以狀申于府府以狀考于明

法吏吏上言謹按寶應詔書凡以政績將立碑者具所紀之文上尚書考功有司考其詞宜有紀者乃奏明年八月庚午詔曰可令書其章明有以結人心者揚揭于道周云涇水東行注渠醜而為三以沃闕中故秦人常得善歲按水部式決洩有時畎澮有度居上游者不得擁泉而顓其腴每歲少尹一人行視之以誅不式兵興已還寢失根本涇陽人果擁而顓之公取金流浸源為畦私開四竇澤不及下涇田獨肥他邑為枯地力既移

地征如初人或赴訴泣迎尹馬而占涇之腴皆權倖家  
勢足以破理訴者覆得罪繇是咋舌不敢言吞冤銜忍  
家視孫子長慶三年高陵令劉君勵精吏治視人之瘼  
如鰥疽在身不忘決去乃循故事考式文暨前後詔條  
又以新意請更水道入于我里請杜私竇使無棄流請  
遵田令使無越制別白纖悉列上便宜掾吏依違不決  
居二歲距寶厯元年端士鄭覃為京兆秋九月始具以  
聞事下丞相御史御史屬元谷實司察視持詔書詣渠

上書得利病還奏青規中上以谷奉使有狀乃俾太常  
撰曰京兆下其符縣主簿談孺直實董之冬十月百衆  
雲奔憤與喜并口謠手運不屑鑿皮揆功什七八而涇  
陽人以竒計賂術士上言白渠下高祖故墅在焉子孫  
當恭敬不宜以畚鍤近阡陌上聞命京兆立止絕君馳  
詣府控告具發其以賂致前事又謁丞相請以額血汚  
車茵丞相彭原公斂容謝曰明府真愛人陛下視元元  
無所恠第未周知情僞耳即入言上前翌日果有詔許

訖役仲冬新渠成涉季冬二日新堰成駛流渾渾如脈  
宣氣蒿荒漚冒迎耜釋怨開塞分寸皆如詔條有秋之  
期投鋪前定孺直告已事君率其寮躬勞俸之烝徒謹  
呼奪襪而舞咸曰吞恨六十年明府雪之植奸犯豪卒  
孰施為嗚呼成功之難也如是請名渠曰劉公堰曰彭  
城按股引而東千七百步其廣四尋而深半之兩涯夾  
植杞柳萬本下垂根以作固上生材以備用仍歲旱沴  
而渠下田獨有秋渠成之明年涇陽三原二邑中又擁

其衝為七堰以析水勢使下流不厚君詣京兆索言之  
府命從事蘇持至水濱盡撤不當擁者由是邑人享其  
長利生子以劉名之君諱仁師字某彭城人武德名臣  
刑部尚書德威之五代孫大厯中詩人商之猶子少好  
文學亦以籌畫于東諸侯遂叅幕府厯尹劇縣皆以能  
事見陟率不時而遷既有績于高陵轉昭應令俄兼檢  
校水曹外郎充渠堰副使錫朱衣銀章計相愛其能表  
為檢校屯田郎中兼侍御史幹池鹽于蒲錫紫衣金章

歲餘以課就加中執法理人為循吏理財為能臣一出  
于清白故也先是高陵蒙被惠風而惜其捨去發于胷  
懷播為聲詩今采其旨而變其詞志于石文曰

噫涇水之逶迤溉我公兮及我私水無心兮人多僻錮  
上游兮乾我澤時逢理兮官得材墨綬移兮劉君來能  
愛人兮恤其隱心既公兮言既盡縣申府兮府聞天積  
憤刷兮沈痾痊劃新渠兮百畝流行龍蛇兮止膏油遵  
水式兮復田制無荒區兮有良歲嗟劉君兮去翱翔遺

我福兮牽我腸紀成功兮鑄美石永信詞兮昭懿績

蘇州嘉興屯田紀績頌

并序

李翰

禹平九土溝洫之功大棄粒蒸人稼穡之務重自古有  
國家未嘗不率由斯道底慎其業故登平足以厚生殖  
禍難足以定凶災未有易此而能理者自羯戎亂常天  
步多艱兵連不解十有四年因之以飢饉重之天札死  
者曝露亡者惰遊編版之戶三耗其二歸耕之人百無  
其一將多於官吏卒衆於農人古者八家為鄰一家從



軍七家從之。猶曰：興師十萬，內外騷動，不得操農桑者七十萬家。今乃以一夫家食一伍一餘子衣一卒師將，不立人將，不堪此。聖上所以盱食宵興，求古今令典，可以濟斯難者，莫出乎屯田。廣德初，乃命相國元公昌其謨，分命諸道節度觀察都團練使統其事，擇封內閒田，荒壤人所不耕者，為其屯，求天下良才善政，以食為首者，掌其務。屯有都知羣士，為之都知，有治即邑為之官。府官府既建，史胥備設，田有官，官有徒，野有夫，夫有任。

上下相維如郡縣吉凶相恤如鄉黨有誅賞之政馭其衆有教令之法頒于時此其所以為屯也雖天子命之股肱贊之至於宣上命齊下力經地域制地事辨土宜均土法簡穡器修稼政陳三壤之種而敬其始考九農之要而成其終則都知之職專達其事焉詎可以非其人哉浙西觀察都團練使御史中丞兼吳郡守贊皇公上國大賢憂公如家慎擇厥官以對明命浙西有三屯嘉禾為之大乃以大理評事朱自勉主之且揚州在九

州之地最廣全吳在揚州之域最大嘉禾在全吳之壤  
最腴故嘉禾一穰江淮為之康嘉禾一歉江淮為之儉  
公首選於衆獨當其任有寬簡惠和之德知艱難勤儉  
之事政達乎本智通乎時仁愛足以結下機權足以成  
務嘉禾大田二十七屯廣輪曲折千有餘里公畫為封  
疆屬於海濬其畎澮達于州求遂民治野之法修稻人  
稼澤之政芟以殄草剔以除木風以布種土以附根頒  
其法也冬耕春種夏耘秋穫朝巡夕課日考旬會趨其

時也勤者勞之惰者勗之合耦助之移田救之宣其力也下稽功事達之于上上制祿食復之于下叙其勞也至若義感於內誠動於中徇國忘家恤人猶已野次露宿簞食瓢漿盡內體之勤趨一時之役大寒栗烈而猶執鼓鼓盛暑赫曦而不傳車蓋如登高去梯與之死生投醪均味忘其飢渴然後知仁義之政必見於耕獲井田之法可施於甲兵夫如是人將竭其力地將盡其利天將與其時自贊皇為郡無凶年自朱公為屯無下歲

元年冬收入若干斛數與浙西六州租稅埒朝嘉厥庸  
授廷尉評公又稽氣授時如前代法有白雀集于高豐  
屯廩蓋大穰之徵也屯官某乙等聚而稱曰初公為屯  
人有二懼焉邑人懼其暴屯人懼其擾今溝封大牙而  
不相侵疆場日履而人不知方舟而上以饋師旅此功  
及於國也登量而入以寬征税此德加於人也古者智  
效一官政修一鄉猶歌之詠之手之足之況朱公之績  
如此其大者乎遂相與斲琬琰表阡陌南陽太守豈專

刻石之功桐鄉嗇夫終踐大農之位其辭曰

沿沿九區陽九躔災丘荒札瘥田卒汚萊天步未移連  
師滿野不耕不穫仰食于下嗷嗷遺人餬口饋軍帝曰  
予憂爰立其屯且戰且耕古之善經辟師肅祇王命是  
聽嘉禾之田際海茫茫取彼榛荒畫為封疆宋公莅之  
展器授方田事既飭黎人則康我屯之稼如雲漠漠夫  
位基布溝封綺錯朱公履之勸耨趨穫稂莠不生螟螣  
不作歲登億計征寬稅薄息我蒸人遂其耕鑿我屯之

庾如京如坻嘉量是登方舟是維贊皇獻之達于京師  
飽我六軍肅將天威畎距于溝溝達于川故道既堙變  
將為田朱公濬之執用以先浩浩其流乃與湖連上則  
有塗中亦有船旱則溉之水則泄焉曰雨曰霽以溝為  
天俾我公私永無飢年公田翼翼私田蕤蕤不侵其畔  
不犯其疆我倉既盈爾廩維億屯人熙熙邑人怡怡不  
擾其務不干其時我無爾暴爾無我欺我有官屬朱公  
訓之我有徒位朱公恤之我有衆役朱公卒之我有徵

功朱公序之起於田中印綬纍纍何以況之福祿如茨  
何以久之刻篆于碑

唐天台山新桐柏觀之頌并序 崔尚

天台也桐柏也代謂之天台真謂之桐柏此兩者同體  
而異名同契乎玄道無不在夫如是亦奚必是桐柏邪  
非桐柏邪因斯而談則無是是無非非矣而稽古者言  
之桐柏山高萬八千丈周旋八百里其山八重四面如  
一中有洞天號金庭宮即中右弼王子晉之所處也是



之謂不死之福鄉養真之靈境故立觀有初強名桐柏  
焉耳古觀荒廢則已久矣故老相傳云昔葛僊公始居  
此地而後有道之士往往因之壇址五六厥迹猶在洎  
乎我唐有司馬練師居焉景雲中天子布命於下新作桐  
柏觀蓋以光昭我玄元之丕烈保綏我國家之永祉者  
也夫其高居八重之一俯臨千仞之餘背陰嚮陽審曲  
面勢東西數百步南北亦如之連山戕戕四野皆碧茂  
樹鬱鬱四時恒青大巖之前橫嶺之上雙峯如闕中天

豁開長澗南瀉諸泉合漱一道瀑布百丈懸流望之雪  
飛聽之風起石梁翠屏可倚也琪樹珠條可攀也仙花  
靈草春秋互發幽鳥清猿晨暮合響信足賞也始豐南  
走雲嶂間起剡川北通煙岑相接東則亞入滄海不遠  
蓬萊西則浩然長山無復人境總括輿祕鬱為秀絕包  
元氣以混成鎮厚地而安靜非夫神與仙宅仙得神營  
其孰能致斯哉故初構天尊之堂晝日有雲五色浮靄  
其上三升投龍之所時有異雲氣入堂復出者三書之

者記祥也。然後為虛室以鑿戶，起層臺而累土，經之殖  
殖，成之翼翼，綴日月以為光，籠雲霞以為色，花散金地，  
香通玄極，真侶好道，是遊斯息。微我練師，孰能興之。  
練師名承禎，一名子微，號曰天台白雲河內溫人。晉宣帝  
弟太常馮之後，祖晟仕隋為親侍，大都督父仁最。唐興  
為朝散大夫，襄州長史，名賢之家，并代清德，慶靈之地。  
生此仙才，以為服冕乘軒者寵，患吾身也。擊鐘陳鼎者，  
味爽人口也。遂乃捐公侯之業，學神仙之事，科籙教戒。

博綜無所遺竄冥夷希微妙詎可識無思無為不飲不食仰之彌峻巍乎其若山挹之彌深湛乎其若海夫其通才練識瞻學多聞翰墨之工文章之美皆忘其所能也練師蘊廣成之德睿宗繼黃軒之明齋心虛求將倚國政侃侃然不可得而動也我皇孝思維則以道理國協帝堯之用心寵許由之高志故得放曠而處逍遙而遊聞練師之名者足以激厲風俗睹練師之容者足以脫落氛埃以慈為寶以善救物神以知來智以藏往允

所謂名登仙格迹在人寰與不可測已夫道生乎無名  
行乎有情分而作三才播而作萬物故為天下母脩之  
者昌背之者亡故為天下貴況絕學無憂長生久視也  
哉道之行也必有階也行道之階非山莫可故有為焉  
有象焉瞻於斯仰於斯若舍是居教將奚依損之又損  
之以至於無為玄門既崇不名厥功朝請大夫使持節  
台州諸軍事守台州刺史上柱國賈公名長源有道化  
人有德養物嘗謂別駕蔡欽宗等曰且道以舍德德以

致美美而不頌後代何觀乃相與立石紀頌以奮至道  
之光其辭曰

邈彼天台嵯峨崔嵬下臨滄海遙望蓬萊漫若天合呀  
如地開烟雲路通真仙時來顧我練師于彼瓊臺練師  
練師道入玄微喻日安坐凌霄欲飛興廢靈觀練師攸  
贊道無不為美哉輪奐窈窕茫茫通天降祥保我皇唐  
如山是常

唐故中嶽體玄先生潘尊師碑頌

并序

陳子昂

尊師業尚冲密勤毖幽深理心事天所保唯嗇絕聖棄  
智不耀其光故真感冥期珍圖祕學性與天道不可得  
而聞也若乃崇標曠迹遐情遠意志摩青雲蓬視紫闥  
高宗每降鑾輦親詣精廬尊師身不下堂接手而已每  
歎曰大丈夫業於道不能投身霄嶺滅景雲林而疲病  
此山以煩世主吾之過乎遂欲東求蓬萊孤舟入海屬  
天皇敦篤斯道祈款逾深躊躇山隅絕策未往既而金

革有命鑣轡遺區於戲昔姑射有神人堯輕天下崆峒  
有至道軒屈順風玄真高蹤萬古同德何其盛哉尊師  
有弟子十人並仙階之秀然鸞姿鳳骨眇愛雲松者唯  
潁川韓法昭河內司馬子微皆稟訓瑤庭密受瓊室專  
太清之業遺下仙之儔谷汲芝耕服勤於我蓋厯歲紀  
也始尊師受籙於茅山昇玄王君王君受道於華陽隱  
居陶公陶公至子微二百歲矣而玄標仙骨雅似華陽  
夫偕真蹈冥鍊景遊化者其心必有類乎昭等永惟尊



師靈迹洞業高深邁古而棄世往矣其若之何乃斲石  
幽山勒頌玄德其辭曰

觀元化兮求古之列仙得瑤圖與金鼎信元符之自然  
神與道而惟一天與人兮相連苟精守以專密必駕景  
而凌煙丹丘不死兮羨門子黃宮度世兮吾體玄體玄  
之至德兮洵淑美沖心養和寶元始初學茅山濟江水  
乃入華陽洞天裏道逢真人兮昇玄子授以寶書青台  
旨令守崧山玉女峯雲棲窮林兮五紀聖人以萬機為

貴而我以天下為累聖人以大寶為尊而我以天下為  
煩是以冥居於岷嶓寄遺迹於軒轅有唐高宗今天子  
之光好道樂仙兮思彼雲鄉千旌萬騎兮翠鳳凰遨遊  
汝海兮箕山陽朝拜白茅夕紫房齋心絜意緬相望祈  
問玉真及玉皇何以得之受天昌黃庭中人在子身窈  
窈冥冥精甚真去汝驕氣與淫神勤能思之道相親遂  
解形而遺世乘白雲而上賓弟子不知其所往乃刻石  
以思真

長明燈頌

井序

高邁


離婁之目處闇室或不能覩燈處之皎如也澄公之掌  
在玄夜或不能照燈在之了如也故大雄氏以方便力  
救黑暗界籍其光誘其人佛所以有然燈名法所以有  
傳燈義大抵長明燈是其蘊乎夫日主晝太陽之精中  
則昃昃則沒我長明燈不沒月主夜太陰之精滿則虧  
虧則盡我長明燈不盡日月尚爾況小光小明哉要自  
積苦為海舉足見溺積邪為山舉手見礙竟不髣髴之

或髣髴之不克成就之言之可為長歎我邑中有俊傑  
主此然燈精進成就於寶融寺經藏院且夫蘭炷藝火  
吾見其盛未見其微也鐵盆盛膏吾見其增未見其減  
也一籠而四時長花滿室而終歲不夜人見之者一作  
禮眼蒙利再作禮心蒙爽心眼自相照了內外由是洞  
徹然則終日見燈未嘗見燈終日不見燈未嘗不見燈  
夫達觀者乃如是也意者不獨於此直上照一天二天  
乃至三十三天無門不闢恒沙善人由茲而入直下照

一地二地乃至一十八地有獄皆開多劫罪人由茲而出若然者四維上下虛空可思量不可不思量邪我長明燈實相功德亦復如是邁三數年內願銘頌之間迫賤事未構斯文一朝染目疾朦朧而不自審從何得也遂夢神人語邁曰子於長明燈其有負乎邁應聲而寤寤而起起而作頌明日目愈頌曰

見外燈長明見內燈長明萬惡自光中滅萬善自光中生不見一燈百千萬億燈乃至於無窮不見一人百千

萬億人歸之於大同空則是色色即是空弟子作頌允  
執厥中



唐文粹卷二十一

欽定四庫全書

集部  
唐文粹卷三十三

詳校官庶吉士臣謝恭銘

助教臣常循覆勘

總校官檢討臣何思鈞

校對官中書臣陸 湘

謄錄監生臣馮萬程

欽定四庫全書

唐文粹卷三十二

宋 姚鉉 編

頌 戊總五首

祠祀三

旌儒廟頌 賈至

陝州鐵牛頌

少華山佑順侯碑頌 房鄴



監牧二

大唐開元十三年隴右監牧碑頌

張說

岐邠涇寧四州八馬坊碑頌

邵昂

旌儒廟頌

并序

賈至

觀象考厯本乎元辨方正位稽乎極體元御極莫先乎  
教教之大莫大於儒旌儒有祠我新典也昔秦滅義軒  
之制廢唐虞之則大撓學徒竭索儒黨懷書捧檄者鱗  
集唐至然後罪九流之異論尤百氏之殊術無辜殺身

有道併命冤骸積於坑谷流血染於泉壤蹈仁義而死  
者不可勝紀開元末天子在驪山之宮登集靈之臺考  
圖驗記周覽原隰見鄉名坑儒顏整猶在慨然感亡秦  
之敗德哀先儒之道喪強死千載遊魂無依乃詔有司  
是作新廟牲幣有數以時饗祀因祀命鄉號曰旌儒人  
神和悅怨氣銷散於戲秦皇帝以神武邁古并吞六合  
掃天下以一篲艾羣雄如衆草建官罷侯大權在已自  
軒轅以降平一宇宙未有若斯之盛也夫戡亂以武守

武以文文以正崇武以權勝秦皇知權之可以取不知  
正之可以守嚮使天下既定守正崇儒導六經之謨訓  
用三代之文質則唐軒盛美湯武弘業不若也觀夫坑  
儒焚書之意乃欲蓋先王之能事竊作者之鴻名黷衆  
耳以前聞逞私欲於當代此儒之所忌也秦之所志悲  
夫儒以恭儉為宗秦則疲弊生人極力宮室儒以道德  
綏遠秦則竭耗中國勞師四夷儒以宥過議賢秦則刻  
法峭刑賊虐諫輔儒以述先好古秦則私心徇智播棄

典墳夫如是則秦不得不滅儒不得不坑事使然也今  
天子矯覆車之前軌崇明祀於後葉秦之所廢我之所  
興斯區夏無疆之休子孫萬代之福也昔武王封比干  
之墓則招諫之道勸矣晉文表繇上之田則志過之名  
立矣漢高護信陵之冢則尊義之風著矣未若激揚大  
教廟食衆賢上以興天地之經次以存顛覆之鑒下以  
絕厲災之青建一祀而三德具焉鯁臣不敏敢獻頌曰  
於維先王設教崇儒作訓六經為代典謨降及夫子三

千其徒載揚清風文在茲乎天喪斯文道有通塞實生  
暴秦反道背德竊善攘譽師心徇惑焚書坑儒萬古悽  
惻牢落千祀微茫九原驪山之北坎窞猶存草樹無色  
秋雲晝昏時聞夜哭知有冤魂帝在華清登高訪古愍  
默顏塹悲涼榛莽上感亡秦覆車遺武下哀羣哲饗祀  
無主爰降嘉詔聿脩清祠饋之牲牢奠醑以時幽幽廟  
門肅肅靈儀冥冥求食長無餒而粵自漢初迄于隋閏  
亦有令主尊儒尚訓闕典罔崇斯文莫振昭昭神理長

懷幽憤我后濬哲聰明文思敷弘大教咸秩神祇鬼無  
妖災人不癘疵俾爾蒼生富壽無期小臣作頌敢繼刪  
詩

陝州鐵牛頌

并序

乾象元地勢坤稽謀惟觀察孰見元善利物純陰隲而  
不仁坤順為牛或剛克以殊用彼見於陝鄂者其陰隲  
歟其剛克歟寓精堅強壯趾慎固內習坎窞外形端倪  
居于道周敦兮若樸謂為首匪如山之狀謂用角匪如

栗之象魯覽古史罔徵其由深不可識孰知其故吾將  
本自然歸神功豈謀人力役鬼傭哉東臨周畿西盡號  
略載厚地而莫聳拒長河而不崩向使非神或微憑子  
之力則城復隍矣人其魚乎乃詢耆耄聽輿誦僉曰此  
之鎮其日固久人由是怙恃物由是生資嘗欲掘地及  
源以觀其微元徒執用大臻于茲橫縻林綆四進雲鋪  
尋下體之極達純陰之精其於退諸泉而入于穴俾圍  
木靡拉懸絙絕縋既致乃窅其見如初五丁力拔而不

及方舟鎖曳而奚可虎無所措其爪猛焉能噬兵無所容其刃投豈皆虛鑣鑣行人無住莅下當函關之路望若隨仙俯桃林之墟時得歸獸若於匹敵必於其倫則長蛇遠閭風而周巨鼇負蓬萊而抃可明徵矣且察內以外觀遠以近在端鋌之末固未可量也亦何知不礪礪數州之間日用有迷其力矣夫能利於物帝之念擇善而為臣之忠是以我國家咸秩無文發天使以祀我明牧謀始有作招墨客以頌頌者誦也容也誦令德昭



厥容冀穆如清風敢刊之貞石頌曰

杳冥精兮混茫氣凝為伏牛載厚地巨靈西掌屹鼎屬  
長河東流泮沸渭堅立不動神之至層城固護人大庇  
德合無疆其可既昔人無述今之是志

少華山佑順侯碑頌

并序

房 鄴

上嗣位九年以宗室弄兵皇居失守大駕東狩至于華  
嶽明年同華連帥太傅許公罷藩邸兵復諸子位正皇  
儲立母后朝廷又安中外咸若又明年宮闕復就乘輿

反正封少華佑順侯崇祀也始者內外橫起右輔騷然  
警蹕難追宗社不復扶持關輔徒為局鐫抗表奉迎莫  
迴天睠公即馳單騎詣行在所肉袒徒跣雪泣上言曰  
廟主不行陵寢不告蒼黃順動莫知攸往況西無正名  
之伐東異省方之行南征無復國之期北濟乏召君之  
慮華當關右不遠王畿未虧巡狩之名免負出君之恥  
可以為百辟會朝之地諸侯輸貢之府地雖不廣足以  
助供億兵則非衆足以備扞禦時也謹論確然宸心不

返宣問往復至于再三嘉謨不聽忠言不納大事將去  
羣心恟然闕內諸侯惟公獨任非神啟聖不能釋明主  
之疑非神祐忠不能壯純臣之節既而上察公之志不  
可奪也諒公之言必可復也由是天迴日轉龍起雲從  
乃睠是邦因駐清蹕上復交泰之道下無疑間之憂內  
難既夷外兵以息皇嗣之不正者濱于五紀今則因公  
以正之坤儀之不定者殆乎百稔今則因公以定之君  
臣以協父子以親夫婦以倫有國之大本也公一舉而

得之豈筆舌所能論哉咸以公仗順討逆神實佑之佑  
順之封非神莫尸璽書爰來牲幣以告是命下客書石  
誌之鄴耳目奇功縑緗具美授簡執筆略無愧辭姑錄  
許公貞順之誠少華保佑之實以明報神以勸事君至  
於極天鎮地之崇固國經邦之力降神生賢之運仙峯  
靈掌之奇嶽有舊封國有常祀今茲紀述故不復云頌

曰

惟峯之始因山以紀蓮峯東秀終南西峙少華居中不

封不紀歲在丙辰暴兵中起天子震驚蒙塵旅次豈無  
近藩諸侯莫至惟我許公聞風奮臂一騎迎鑾六龍迴  
轡行朝有亭行廟有位宗戚以歸兵戎以弭爰立母后  
始正皇嗣乃君乃臣乃父乃子家國大倫禮無違事社  
既啟侯封亦明祀金天之毗佑順之美乃刻貞珉永證  
惇史

大唐開元十三年隴右監牧頌德之碑

并序

張說

周禮校人掌王馬之政天子十二閑馬六種閑為一廐馬二百一十六應乾之策也六廐成校五良一駑是之謂小備校有左右閑成十二合月之道也駑馬三良馬之數凡三千四百五十六是之謂大備秦并一海內六萬騎之國馬盡歸之帝家則周制陋矣漢孝武嘗文景儉約之積雄衛霍張皇之勢勒兵塞上廐馬有四十萬匹及東漢魏晉國馬陵夷不可復逮武帝時矣後魏胡馬入洛蹴蹋千里軍陣之容雖壯和鑾之儀亦闕大唐

接周隋亂離之後承天下征戰之弊鳩括殘燼僅得牝  
牡三千從赤岸澤徙之隴右始命太僕張萬歲葺其政  
焉而奕世載德纂脩其緒肇自貞觀成于麟德四十年  
間馬至七十萬匹置八使以董之設四十八監以掌之  
跨隴西金城平涼天水四郡之地幅員千里猶為隘狹  
更析八監布於河曲豐曠之野乃能容之于斯之時天  
下以一縑易一馬秦漢之盛未始聞也張氏中廢馬官  
亂職或戎狄外攻或師國內寇垂拱之後二十餘年潛

耗大半所存蓋寡開元神武皇帝登大寶受靈符水瑞  
感而河龍出星精應而天駟下二年春帝乃簡心腑善  
畜之將卜福佑宜生之長俾領內外閑廐使焉即開府  
霍國公其人也公名毛仲姓王氏開元佐命之元勲東  
國亡王之後裔四伯輔禹與治水之謨四七興漢在經  
星之列清明虛受察命冰鑑籌謀先覺慮出著龜竭無  
私之忠而善歸天造輸不懈之力而玄同日用故得騰  
躍風雲攀附日月策功第一承恩莫二庭羅魏絳之鐘



鼓第賞京邑之山林文馬蕃錫於晉侯御衣亟分於韓  
信庶姜如玉則降榮彤管衆子垂髫則抱拜朱第聖人  
之見也必猶爾為之四顧而滿志聖人之不見也乃恤  
然若無與樂其天下仲尼所謂是必才全而德不形者  
也夫處其身則立無跂正也視而還端也聽無聳誠也  
言無遠慎也國有憂未嘗不感國有慶未嘗不怡其御  
下則明利害之鄉阜財求之務使之趨善而避害懷德  
而畏威身不離於闕庭令遠行於垌牧亦有不學而暗

合於古未更而懸辨其事然其從政必問於遺訓而資  
於故實者也若夫春祭馬祖夏祭先牧秋祭馬社冬祭  
馬步敬其本也日中而出日中而入焚原燎牧除辱豐  
廄時其事也絜泉薦房涼棧濕翹足而陸交頸相靡  
宣其性也攻駒教駢講馭威僕刻之剔之羈之策之就  
其才也不反其性故親入樂藝節樂如舞之心自生不  
窮其才故闔扼驚曼竊轡詭銜之態不作爾乃舉其神  
異則望駟駮騾褭垂黃茲白來儀外廄呈伎內樞朝刷



外又有閑人萬夫散馬千隊骨必殊貌毛不雜羣行如  
動地止若屯雲百蠻震聳四方抃躍威懷紛紜壯觀揮  
霍迴衡飲至朝廷宴樂上顧謂太僕少卿兼秦州都督  
監牧都副使張景順曰吾馬幾何其蕃育卿之力也對  
曰帝之福也仲之令也臣何力之有因具上其狀帝用  
嘉焉霍公口無伐辭貌無德色朝髦庠齒歆以多之於  
是明威將軍行右衛郎將南使梁守忠忠武將軍行左  
羽林中郎將西使馮嘉泰右千牛長史北使張知古左

驍衛中郎將兼鹽州刺史鹽州監牧使張景遵隴州別駕循武縣男東宮監牧韋衡都使判官果毅齊琛總監韋績及五使長戶三萬一千人僉曰自開府庇我十三年矣畜有婉息人無乏匱克厭帝心莫匪嘉績且如停西南兩使六頓人夫藁穀計八十萬工圍石以息人約費其政一也納長史隱田稅二萬五千石以儉私肥公其政二也減太僕長支乳酪馬錢九千三百貫以窒隙止散其政三也供軍筋膠十萬七千斤以收絹繕工其政

四也時苧麥苜蓿一千九百頃以芟蓄禦冬其政五也  
使監官料舊給庫物新奏置本收分其利不喪正錢二  
萬五千貫以實府宜官其政六也賈死畜貯絹八萬往  
嚴道市焚僮千口以出滯足人其政七也五使長戶數  
盈三萬墾田給食糧不外資以勤農卻輓其政八也敢  
問監牧之事孰能加於此乎然則稱伐計功前典所貴  
上以美聖主擇才之得人下以贊忠臣受任之盡節未  
以道官屬承風之成事竟以示後代昭前之令聞是四

烈者不可廢也既而大君有命舊史書功吟詠瓌竒篆  
刻金石秦汧眇眇尚想非子之風魯野區區猶傳史克  
之頌試從此而觀彼夫何足以言哉頌曰

皇天考牧兮聖之君四十三萬兮馬為羣塹汧渭兮垣  
隴阪飛黃阜兮昆蹄苑山崆峒兮水鳴咽泉噴玉兮草  
汗血聚如花兮散如雪性既馴兮才亦絕維國家之大  
事駕時龍兮祭天地和鑾發兮文物備維皇帝之七德  
總戎馬兮威萬國彩髦翻兮金介胄有霍公之掌政擇

張氏之舊令天王大駕兮仗黃麾太僕驂乘兮展輅儀  
舞月駟兮蹠重螭神侑儻兮態權奇騏驎溢野兮牛羊日  
多子孫榮位兮恩寵如何頌皇靈兮篆石鼓萬斯年兮  
羣玉府

岐邠涇寧四州八馬坊碑頌

并序

卻昂

垂象者玄上昭乎天廢天駟體玄者聖下列乎庾人校  
人稱騏其德亦已遠矣願言馬之志曾有意乎粵若乾  
道為良坤元利牝駒從渥水駿發中廬屈產貴其能鳴



鴈門多其美脊豈止宗生冀北族施汧西而已哉自相  
土運其天機孫陽明其骨性秦贊泣其前後許衛詳其  
色毛悲伐在其股膺寒管議其屑齒麻朝訾其頰胘女  
厲辨其目眸昔軒轅得之過寒門穆滿得之遊崑崙周  
王得之平東鄰漢帝得之定西秦我高祖得之四尺至  
我開元得之五輅備敢問毛蟲三百六十其誰力多於  
是乎夏因以還經傳莫紀周制廐馬始頒厥官凡十二  
閑馬三千四百五十六始皇吞并寓內六萬騎之國馬

盡歸秦漢武大脩佳兵崇飾戰馬至四萬匹是多乎  
哉自魏及隋天下騷動勞疲死轉數不足徵我有唐之  
新造國也於赤岸澤僅得牝牡三千匹命太僕張萬歲  
徇隴右馴字之四十年間孳婉成七十萬六千匹屬張  
氏替職圉師敗官馬之教駢日失其序逮開元初唯得  
二十四萬匹至十九年復成四十四萬匹今之盈縮亦  
不甚過上耕藉之明年命我邠公典斯馬政公齊其飲  
食視其良駑廩芻房涼網惡去害天子以公有伯翳宜

生之德爰錫土田日碑善養之功真堪宰相即召公入  
掌三事外司百揆調飪鼎實緝熙帝繇夷吾果理於高  
僊咎單謚暢於伊尹帝曰若予邠之後亮采惠疇僉曰  
元祐帝曰俞咨祐汝作小司空兼牧牧圉李公言成允  
令才實允宗恪居本朝能率大憂載習載步稚之秣之  
疏穢鎮浮受劑聽訟匪燒匪剔斯馬斯材荷天之寵未  
可涯也判官尚乘奉御長孫勗壽安尉賀蘭弼華陰主  
簿常異並心懸規鏡家韞賜書投刃靡全應機立斷侶

昌門之驂乘行翼聖仙諧子況之能官坐登鄉相有原  
迂浦非大而何雅所謂愷悌君子干祿愷悌信矣先是  
國家以岐山近甸幽土晚寒寧州壤甘涇水流惡澤茂  
豐草地平鮮原當古公走馬之郊接非子大丘之野度  
其四境分署八坊其五在岐其餘在三郡保樂第一蘇  
忠主之甘露第二劉義尸之南普潤第三田敬董之北  
普潤第四邵業監之岐陽第五李行守之太平第六馬  
慶尹之宜祿第七魯敵領之安定第八李仙正之八人

者或折衝禦侮或果毅昭代射馭不違始終惟一支命  
朝散大夫都苑總監韋績總以統之韋公敢行利物克  
壯遠猷悉心效官盡瘁事國口占諸吏躬親百為攻特  
執駒禁麤驅蠶撫飮趣馬慰薦庖人陳損益以示其方  
明賞罰以防其慢立封準以程其課均衆寡以節其宜  
告之以畏威申之以誘掖曰善而筐蜃鴈而瓊纒除而  
並翦而蓋偕當循爾職制無使我馬玄黃抱公絕私匪  
怒伊教君子曰韋公之懷下如此欲辭福祿得乎人從

話言馬賴調蔡將蕃其類必謹其初故春祭房星尊祖也夏祭先牧尚養也秋祭馬社敬乘也冬祭馬步存神也然後時其出入傾其肥羸一其種性殊其草樠分別淑慝無相奪倫試言夫名且曰獻狀其名則汗血山子桃驂綠耳金喙騰黃騊吾吉光蒲稍啟服野靡娥鹿白蟻雞斯蜚鴻母兒遺風駢裏茲白鐵離項王之騅符主之騶桓氏之驄晉侯之駮魏公絕影唐國驕驕劉之的顙呂之赤兔其狀則八尺之戎七尺之駮六尺之驕三尺之果下文臂

花肩陰脣白顛握蹠作足昆蹄素懸縞形如鍊紫目如  
電有駝有騏有駟有驪騊駼異羣驪駟亦分散如摘錦  
聚若屯雲若迺審其容貌觀其尾鬣司其正骨鑑其回  
毛膺為稱桀肘為咸陽幹為第方背為闕光水火又明  
城郭又張逸躍翹陸趨趨跼顧陞甌齧草降阿飲沱駢  
而翔馭而走如龍如鬼或寢或叱羈至特立仰鳴俯噴  
威儀變態不可談詳田事孔昭軍容大備有馬如此何  
憂乎戎由是判官長上果毅都尉成公雅真尹承順兼

諸寮吏及四郡齊人八坊長戶因雜然相與謀曰自天子亭育我邠公覆露我李公司牧我韋公懷休我君臣同德其利溥哉若不毛舉數事指敕大較雖隸圉之後將不食吾餘且保樂者隋石門馬坊也其舊制褊狹多厯年數棟折榱摧墮牆填塹甘露先置在九成苑外士良蒙美不迨苑中今茲數公得請于帝有詔令新保樂徙甘露所云初葺許用正錢今則量抽掌閑供飼國馬數內商榷納其資課迴給工人計一歲省庫錢七百貫



有奇以約財理國其利一也甲令曰諸馬坊每年四月十一日停料野放今則以三月中候陽崖墳盈春草先長便停藁穀俾遂州原計一歲減菽粟四千石糞秆三萬圍徠來年之用以隨時預蓄其利二也八坊管田一千二百三十餘頃析置十屯密邇農家悅來租墾王在京邑則稅其生芻天旋洛師乃藏厥嘉實歲中收貯二萬五千石薪蒸倍之以妥毗盡地其利三也又緣馬所須羈絆剪刷鬪鑊春帚油藥灌劑之物又斷滌除之器

比年皆旁勞州縣長度公錢誅求無時不給其用浸以  
承弊人多懼憂今則權差夫丁率自采造成二萬六千  
五百三十石升枚具歲中省百姓供費三千貫以柅煩  
激情其利四也內廢馬每年有瘠者病者老者疲者擇  
其不任者以頒諸坊則必餒之艾之行節之俟其跳  
梁俟其充臍而後入之以內癰起廢其利五也是五者  
有仁人焉有王政焉何獨師古始為成憲則知從邠公  
之教可以阜從李公之法可以經從三判官之幹蠱可

以事事無留從帝公之訾書可以孜孜不怠古者有勞  
於國則紀之有功於人亦紀之里克賦在垆之頌燕公  
篆監牧之作吾從二史臣之後安敢墜於斯文其詞曰  
天王垂玉兮德至山陵澤馬于島兮屢惟休徵君命臣  
力兮庶績其凝八坊載就兮畢來斯昇岐山之下兮田  
疇好湮水之將兮多媿草繚垣墉兮積芻橐天馬來兮  
從東道羣紫鷺兮駢綠蛇骨象奇兮歸帝家毛御風兮  
蹄踐雪舉籥雲兮低噴沙既伯既禱兮無裁害有駸有

容兮真沛父縞身朱鬣兮又白顛  
晚影長鳴兮聲造天  
今安匹兮龍為戎吾君馭兮壽千年

唐文粹卷二十二